

頌

天

臚

筆

頌天臚筆卷之二十三

吳門布衣金日升茂生纂輯

附紀

闡錄

甲子科主考以觸牆被黜者今摘其詞爰昭禍本以彰謹論也

湖廣

考試官

方逢年

字書田浙江遂安人壬戌進士翰林院編修

章允儒

字珍甫江西南昌人丙辰進士兵科左給事中

程策第一問

方

召對之典尚遲遲未舉說者謂一權璫實陰

沮之邇且竊弄威福

宮府漸睽舉朝交擊之而莫能去矣夫以  
皇上英明天縱豈終爲此輩所蒙但時事多艱  
斷之蚤則泰交易而世現清明斷之遲則  
否隔滋而世仍晦塞一內一外之際決機  
甚微而所關于世運固甚亟也

第一問

方逢年作

謝錫賢

蓋聞天閭而地不迓雲應之地開而天不  
決霧應之惟是陽交于陰陰交于陽物登

明堂喬喬皇皇此大易泰交之說也泰者  
通也天地間有必交之陰陽別而不交則  
中斷其精旣觭于異而不得通亦有必別  
之陰陽交而不別則共爭其所又溷于同  
而不得通易通志之書也故于上下之交  
穆然慶幸若有神游其盛之想焉易又定  
分之書也故于內外之辨凜然深防更有  
間不容髮之虞焉良以陽之象如旭日和  
風康莊靜浪具丈夫氣肖乾之健毅然而

蛟龍翔鏗然而鸞鳳鳴是君子品也不宜  
擯之外者也陰之象如盲風妬雨峭壁崩  
湍多婦寺流襲坤之順謹身媚上類尾狐  
蓄情伺釁類首鼠真小人輩也不宜昵之  
內者也但攷之天象人主法紫薇以居中  
羣臣法衆曜以拱外而宦者四星顧反在  
宮門側乃知其不能不內內臣而外外臣  
者勢也而其必當內外臣而外內臣者則  
致泰之機也內而內之將內睭而必與外

爲市惟內而外之則宵人窮于意之無所  
借而內不敢外矚矣外而外之將外孤而  
必與內爲嘗惟外而內之則衆正安于誼  
之有所託而外反足懾內矣此泰寧之世  
不必以陽絕陰以健絕順以君子絕小人  
而卒能使陰化爲陽順化爲健小人化爲  
君子則惟此內外之際能識其機而逆持  
之也試觀書載賡歌更致儆夫僕御贊從  
詩咏訪落且託刺于寺伯巷人則外親賢

而若引之內內遠佞而若推之外固帝王  
圖泰一大關鍵已是以三代而下願治之  
主每留心召對如建武中數引公卿郎將  
講論夜分貞觀中命宰相入閣議事諫官  
隨其後慶曆間龍圖天章閣降手詔給筆  
札使諸臣條對率以虛心延訪故治亦爛  
然一時迨其衰也或以張父趙母取誚或  
以國老門生貽譏或以真王媼相賈敗此  
類未易殫述夫固梟獍不神天與之昏亦

當斷不斷自貽伊感耳洪惟我

太祖高皇帝神聖開天猶日與帷幄諸臣講求  
致泰之術所作

大誥首重君臣同游曰歷代帝王同心一德  
立綱陳紀爲民造福是以感格天地時和  
年豐至于內豎則獨嚴典兵預政之防且  
謂御之之道在使之畏法而不可使之有  
功煌煌

遺訓



列聖永遵故讀楊士奇與李東陽李時輩所輯  
三朝聖諭錄燕對錄召對錄其待臣之誼固極  
殷殷載觀

章皇重儒臣教誨之命

肅皇罷各路鎮守之權振瑾不戒于前保鯨隨  
覆于後嚴明御下之家法又何凜凜也迨  
皇上在宥祓志敬

天勵精法

祖用人若渴從諫如園海內喁喁竊欲旦暮見

太平廼邇來

天聽之寢高也

中旨之頻傳也或疑

皇上有厭薄羣臣之漸而愚曰否蓋閱歷久而  
精光呈如出匣之鏌隱躍欲試此殆出而  
欲還者機至重臣乞身之迭請也元輔  
予告之暫旋也或疑老成有携手同行之漸而  
愚亦曰否彼沐

恩已深豈忍卸責抑河清難俟姑以一去悟

主心耳此殆入而欲通者機至重則削秩輕則  
奪俸言官亦覺無色然拊鑲之呼莫應請  
劔之志彌堅是仰通一機也至災異頻仍  
妖怪迭現天心亦似靡寧然寵以祥瑞爲  
固然惕之儆戒爲獨至尤儼通一機也際  
此天人上下脉脉欲啓之時而一洗淵默  
尊嚴格格難融之套于以面商重務弘濟  
時艱豈非致泰第一義廼牘滿公車而  
庭遲召對將謂

聖躬不宜過勞耶則千矢射鵠萬物酌尊不更  
當爲深宮燕閒慮耶抑謂密地別有芥藻  
耶則舍日于庭就火于室豈真欲資獻納  
于紫貂綠黛手耶抑謂疑義難諳爭端焚  
起不宜輕示人短耶則處暗漸明更事長  
智姑節略緊要機宜暫撰處分語意寧患  
落落難入耶舉朝揣摩不得其解始爭切  
齒于奧竅間一巨璫大蠹矣夫已氏以匪  
教匪誨之身結在牀在旁之勢乃

皇上過憐其小忠小信之跡竟忘其大姦大詐  
之謀昔之蠱惑其君者至聞聲稱朕深拱  
禁中之說極矣茲則更翻一局亦勸之  
句臚肅仗傳長樂之曉鐘獨不勸之

煖閣疇咨前宣室之夜席昔之潛囑其黨者  
至不令人主親儒生讀書史之說極矣茲  
則又翻一局亦請之緗帙遙披牙籤偶觸  
修

文華殿琳琅展誦之文獨不請之蓬山暫

幸蓮炬頻分復

弘文館更番宿直之典察案亦充署也而銓  
口監謗直欲人爲仗馬轅駒

批答亦如流也而墨勅斜封豈真出之鸞臺鳳  
閣封樁已竭止宜泣衣惜藏胡潛營董賊  
之郿塢時事當規正須擲硯悲陳何笑逐  
韓嫣之金彈秩已盈于中常侍而衽金浴  
鐵復圖觀軍容之尊勛未著于大長秋而  
紆綬鳴璫愈添謁者監之塵刺久在背想

類斷不敢言癭已蒙咽恐踉蹌更難去憲  
臣擊之不動言臣擊之不動併部院卿寺  
擊之俱不動矣公疏弗省單疏弗省併閣  
臣揭帖亦弗省矣甚且奪勲臣之脣喉部  
郎之杖併因事立威鷹史未伸破柱之誅  
而長安大下揆亾之令矣在

皇上或玩爲鷹繚之在手在諸臣深虞夫恙蠹  
之攻心齒之固不避路馬之嫌當之且立  
遭國狗之疾使其爲戀棧駑據巢鳩害固

不可言也使其爲魚脫鈎鹿走險害更不可言也從此怙恩席寵令南北司如水火害固不可言也從此借叢煬竈令官府閒分釜鬻害更不可言也天下大患莫過于版章未裂而人心先睽迺今赤羽交馳黃紙皮閣邊吏呼而內庭莫應

明旨切而外解不前所恃荃宰一心關梁不閉庶幾同舟共濟耳萬一綫脉復斷天下事尚忍言哉蓋此輩殘氣不剛夙饒陰毒貌



示柔順而實小人之困最不樂有泰交者  
也舉國求通而不足一夫潛隔而有餘旣  
隔之後干戈取之而不足方隔之時臺諫  
攻之而有餘況子產云美惡周必復今亦  
皇上必復之候也但復而蚤則宇內卽與河清  
鳳見頓睹泰寧復而遲則宇內仍與陰霾  
地震物怪星妖終歸否塞所望復隍垂憂  
甯河致決破包承之詭計啓茅茹之亨途  
于常朝外復

內朝遺制令閣部大臣及臺諫等官五日一輪  
對一切兵餉用人諸大政倣

先朝于奉天門面取進止寧不足省會議之紛  
紜祛題覆之稽滯防邸報之漏傳乎或事  
體有當裁酌倣

先朝于左順門出諸司章奏面令議旨而可否  
行之或更數字或削數語或執奏移晷寧  
不足隆票擬之權杜

內批之漸革傳奉之弊乎至情誼旣洽倣

先朝頻召時雖內侍亦不知卒致劉大夏戴珊  
輩感恩終身不忍言去寧不足回懸車之  
想激叱馭之忠鼓當闕之氣乎倘有瀝血  
披忱轉喉觸忌倣

先朝虛懷矜釋如赦李夢陽全海忠介故事寧  
不足挽削籍之慘抑

駕帖之橫霽

廷杖之威乎諸如此種種善政皆自外內臣  
而內外臣始蓋惟外其內內其外審異以

致同而後上者下下者上常通而不隔機  
有逆之而乃以順者此類是也先機而發  
如養由基矢未抽而猿已號隨機而應如  
猿善搏矢而中以括倘後機而救不爲飛  
衛之捍棘則舍嚙鏃無法矣矧

先帝堯舜之訓猶在耳也宇內豈無人寧有薄  
視士大夫而覓臯夔稷禹于黃衣閭尹之  
流者况善法堯舜無如周成彼以冲人際  
莽蜂桃蟲之虞祇是夙夜敬止肘以旦肩

以冀賴羣臣之佛肩以答顯命耳至周禮  
閤者守中門之禁寺人掌女官之戒一以  
大家宰領之此又愚所謂內不敢外矚而  
外反足懾內之說也故爲今日諸君子計  
誠不能頓復周制然亦何必蝸蟾沸而螭  
蚌持錮人以不肖之名令占風候氣者流  
潛添虎翼惟是小臣平氣而諍大臣積愆  
以迎共矢血忱于交戟間何渠無感風雷  
回天日時乎蓋

皇上固不世出之主也一旦提陽精而掃陰翳  
則頑雲滯霧不覺頓釋寧復有鬼魅敢竊  
嘯于晴空皎日下者宦官夷狄勢相盛衰  
內蠹旣除則外侮自絕正類邪黨道分消  
長內之小旣往則外之大愈來然後吾

君吾臣優游佯笑于一堂可從容而講登咸上  
理矣明良喜起之歌天保卷阿之什愚生  
請借爲交泰頌以

獻

福建

考試官

顧錫疇

字九疇直隸崑山人萬曆已未進士翰林院簡討

董承業

字紹休山西介休人萬曆癸丑進士兵科右給事中

程策第一問

顧錫疇作

程祥曾

內臣少未知學長不聞政

皇上之輦笑風習之於焉偵注向而懷當又恐  
人共習之於焉傾儕偶而自容以忠誠爲  
悅媚之良媒以幹謹爲憑竊之捷徑以恩  
澤爲權力之便級蓋至預章奏而盈庭之

喙惟所短長矣士良草詔慎由所以怵怩  
也預逮繫而疑赦之罪惟所上下矣輒奴  
內鞠李晟所以懷懼也欲拒諫則隱都俞  
而陳吁咈欲峭法則舍明揚咨卜而譚竄  
流殛放無一不可托之乎帝王而

皇上之情日以勝術日以任以爲

皇上之情與術哉握爪而亾爪者君也惡鼻而  
劓鼻者非君也酸甘鹹淡決于宰尹則輕  
君而重于宰尹矣鼓楫于喁決于樂正則



輕君而重于樂正矣是非枉直決于寵人  
則輕君而重于寵人矣是薄媼之決蔡姬  
也將必爲君治鄴者罪爲左右治鄴者罪  
則學有甚于不學而政特甚于無政

茂齡猶然後將若之何其在今日更有隱慮焉  
皇甫規平定諸羌降者以數十萬而痛絕  
中官不與交通中官遂共誣譖以爲規貨  
賂羣羌令其人降元豐征夏之師舉數十  
萬衆以宦者李憲統之神宗謀不出于公

卿而出于菴寺以鄙執政復遣李舜舉往  
議西事舜舉面折王珪詞義非不嚴且正  
置士大夫將吏于何地盖厭薄鈞察之漸  
未有不至于是者萬一有是誰敢有負貌  
類藝祖宅枕乾岡之謗自請討賊如王德  
用者乎誰敢有仁愿徃代表陳便宜自請  
留鎮海東如劉仁軌者是之爲隱慮愚謂  
不可不思其所自者此也

右二省主考以此觸藩俱被削奪  
戊辰俱蒙環召

浙江

考試官

陳子壯

字集生廣東南海人萬曆已未進士翰林院編修

周之綱

字振之河南商城人萬曆甲辰進士吏科給事中

論

天下事制之在始

陳子壯作

翁鴻業

漢武帝之雄也田蚡驕恣崑權除吏非人帝罷蚡後遂不任宰相而左右寵幸反得闢薦天下士論者謂厥後政歸閹宦皆武帝始之甚矣其責備英主也夫自宰相以至寵幸自寵幸以至

闡宦其權愈失其失愈下雖英主不覺勢有必然故曰天下事制之在始

江西

考試官

丁乾學

字天行順天宛平人萬曆己未進士翰林院簡討

郝士膏

字臣水陝西郿縣人萬曆癸丑進士吏科給事中

前序

丁乾學作

通來舉國有所抵適未卽下又有所摧折顧聖人之心忽而雲翳忽而虛明其何可測

程策第二問

郝士膏作

艾南英

今天下夷狄盜賊奄豎以及兵患民患莫  
不灼然衆著

第三問

丁乾學作

雷穀

中旨頻頒緹騎時下今且以通國爭而不勝凡  
再辱士大夫而天下亦旣虞寺人且天下  
事變寧可豫料漢穰夷狄曹節王甫與張  
角兩亂之唐苦藩鎮仇士良劉季述與王  
仙芝兩亂之

當時汪直劉瑾之禍釀之有端去之有術

其不可用罔明甚東陽之委蛇既未可爲  
健遷之潔已亦豈得策韓文之聲大義固  
未可盡非乎顧何以如楊一清卒清君側  
耶則彰之往而孚號有厲此一豫也

右兩省主考以此俱被削奪戊辰俱蒙  
環召而丁太史先以聞逮怖死悲夫

祠額

兩京附祠額

十三省

案丙丁兩年廣興祠額在在建祠古來希觀之事第野臣深伏艸土聞見寡陋不能悉述今據邸鈔標存數十處用資譚塵統俟博雅君子補正

北京

茂勛祠

宣武門外

廣仁祠

崇文門內

隆恩祠

蘆溝橋左

存仁祠

良牧署中

洽恩祠

嘉慶署中

永愛祠

林衡署中

南京



祠

聚寶門外

普惠祠

蘇州虎丘東

德馨祠

松江

瞻德祠

淮安

沾恩祠

揚州

浙江

普德祠

杭州西湖上左右坊題曰功高社稷威震華夷

湖廣

隆仁祠

崇德祠

江西

隆德祠

福建



山東

褒勛祠

河東

昭德祠

齊寧

山西

報功祠

河南

戴德祠

成德祠

陝西

祝恩祠



四川 顯德祠 房山

大同 嘉猷祠

附祠頌

厥臣心勤爲國念切恤民宜從衆請用建生  
祠○厥臣志安社稷慮切封疆功高籌虜猷  
炳丹心建祠致祝宜協輿情○厥臣捐貲撫  
軍壁壘生色發粟助賑災黎更生賜額建祠  
致祝具見輿情歡躍○厥臣謀國忠心籌邊  
偉績其遣內鎮之清勤揔出厥臣之勞瘁請

于五臺山建祠○厥臣掀天經濟矢口精誠  
豐功偉烈兼摠六官愷澤湛恩暨被萬姓謹  
請于宣武門外擇地鳩工建祠○至德莫隆  
名言下情惟有祝釐○魏上公間出名世以  
澄清世道爲任翊戴聖明爲心○建聰明  
目居高聽卑安卽安社稷之安平非平一方  
之平○掃逆如雷如霆翼正爲雨爲露弘德  
無涯大功無並○赤心中天日月熱腸特地  
乾坤成兩朝大慈大孝佐九重克武克文○

皇上開億萬載靈長之祚尚公特應五百年名  
世之期○股肱良弼社稷元勲扶聖主于  
中興煥宸居于大壯○丹淵浴日靈腕補天  
德耀乾坤勲在社稷○德著廟堂中外享有  
道之福功扶社稷遐邇承無疆之休○上公  
帝簡篤生佐興間出允九五之元臣洵五百之  
名世○魏上公精誠謀國勅法鋤奸轉陰靈  
之日月爲晃朗之乾坤○丹心真可貫日巨  
手直自擎天克軫時艱曲調物力○臣功

既高于鼎彝報宜列于俎豆所請密雲下

山建祠

阻封事略

陳司馬祖苞子孝廉陳之遴述

敘事

逆璫魏忠賢竊柄既久漸睨九錫甲子歲  
遼父司理山海適水將金冠等渡遼民三  
千人歸中有巨猾吳國秉與同舟聶廷瑾  
輩六人有隙走東廠以奴謀告逆璫即假  
此爲茅土計移 樞輔屬父讞定其辭甚  
厲復令罪樞崔呈秀貽父書以顯秩相啖

父庭裂其書榆關將吏咸咋舌爲父危父  
慨然曰履霜堅冰至吾寧以一身易六命  
不爲奄人啓異志也遂盡釋之璫大怒檄  
覆訊辭愈厲父執如初坐是推寧前僉憲  
持不下後改推前職典關迨丙寅春奴以  
十萬騎圍寧遠健兒奔潰關下西虜諸部  
復乘間闌入烽火燭天將吏爭遣其孥歸  
父與母吳氏慷慨誓殉出入手一短刀每  
指關城語諸將曰吾受

命與此與此共爲存亡百口俱在賊至卽闔室  
死不令諸君獨死也衆皆感泣願死守父  
日夜露立關門悉力防禦捕逃卒數十百  
人寘之理東寧士卒始無退志全關以安  
又發憤劾逗遛援帥語在 王大司馬代  
題疏中於是軍聲大震殲奴萬人是役也在  
事諸公謂關外則 袁撫功第一關內則  
遼父功第一逆璫啣父甚忌者復嗾之遂  
乘叙疏未上於

先帝講筵宣言曰陳某壞事該處如何沒人論  
他不拘批在那本上罷適呈秀疏劾遣帥  
矯

旨竟落父職通國愕然及洪關臺歷叙父績  
章下所司時同覆者多

俞延世之賞父僅還原秩獨格不下父歸後璫  
始將武長春羅織奸細冒竊肅寧世券矣  
至丁卯秋

今上御極璫時尚踞禁庭中外觀望未敢發父



從里中上書畧陳阻封之概冀以此試虎  
口開天下言路不意得

旨頗優復屢叨薦舉

環召

聖朝高厚世世何酬但遴竊見逆璫三爵之褫  
費

皇上幾許苦心煩當路幾許彈墨向令人盡執  
法如遴父寧至是哉且父之同官有與父  
同此邊功亦有與父同觸璫焰者先後並

晉卿秩而父首阻冒爵躬扞危疆其勞其  
節似不在諸公之下遴敢訟言之以著一  
時曲徙之意焉

讞牘

直隸永平府山海查覈理刑推官陳祖苞  
爲緝獲事天啓四年十二月十五日蒙

督師閣部孫 憲牌前事准東廠太監魏  
手本前事內開據首狀人吳國秉稱有回  
鄉遼人聶廷瑾等六名原係奴酋遣來奸

細現有多金攜帶在身謀入

京城糾黨內應關外將領悞收干係匪輕等  
情到廠據此爲照逆奴破我遼廣俱用內  
應本廠方痛前車殫力嚴緝今廷瑾等果  
帶多金謀變

輦下事關

宗社爲此合行 貴閣部煩卽轉發嚴審正法  
以靖巨變以憑奏

聞等因爲此牌仰本官卽便密提聶廷瑾等細

加研鞫毋枉毋縱確詳本閣部以憑轉覆等因蒙此該本職密提各犯到廳隔別刑審細查國秉與各犯同船渡海東來因借貸不遂挾仇首告今國秉既留在京細簡各犯行囊止廷瑜廷珍曾克遼東管兵把總果帶已貲三百餘金在身其餘並無可疑字跡物件有在關遼東武職生員一百餘員名具保前來稱如果奸細願甘同罪等情隨經看得聶廷瑾等或戴弁而被羈

囚或素封而遭蕩析備受奴毒同念

天朝彼其宗族妻孥並膏刀斧使非喪心病狂  
誰肯受我接渡得一至于萬死而猶爲仇  
讎役者况回鄉分發邊堡數犯星散于數  
百里之內身在樊籠緇懷不軌隻手寧掩  
合鎮之目邪且原告單詞未經面質衆口  
公保確有可憑則囊金非作奸之媒而上  
刑無懸坐之法悉惟上臺主持他非下  
吏所敢議也等因詳蒙

公三  
閣部依擬轉覆東廠復駁行手本內開奸  
犯聶廷瑾等攜金旣真遼廣覆轍不遠況  
入

京內應一節全不訊實問官故開一面事關  
宗社責有所歸爲此合行 貴閣部煩卽再行  
嚴訊務期鞠實正法以

奏蕩平等因致蒙又行本職覆審得聶廷瑾  
等久陷虜穴效順西歸爾時同來者幾數  
千人矣夫飛鶚食甚尚懷好音况若輩捐

所愛憐終不忘其落葉歸根之意而歸後  
妻孥並戮縱有妄念誰不斬除乎惟是廷  
瑾轉沒西夷身無長物廷瑜廷珍數百金  
之在橐則致疑之根也職覆加刑訊入

京內應之說抵死不服法無可以臆加矧歸  
者囊或累累亦自不乏廷瑜等獨不幸而  
爲仇所首耳應擬量發居庸關外以塞憤  
口以白初心俟三韓稍定再還故壤其廷  
瑾與劉八等四人同載月明絕無弓影宜

各界之寧宇大廣懷柔要之逆奴匪茹在  
事者咸思食肉寢皮豈有知爲間諜尚開  
一面之網總以罪疑難入故寧旣來則安  
若乃多方茲飭邊吏固所服膺而亦自不  
居人後也詳蒙

閣部孫 批如議轉覆各犯卽行分發通  
取收管繳

撫院喻 批各犯率衆歸復自應昭雪聶  
廷瑜兄弟同來奸細無據但



匹夫懷璧致啓釁端卽其罪也量發安置旣以塞疑謗之口又不失歸附之心處置得宜遠人自服如議蚤結前案仍候閣部示行繳

冒爵辨真

自羣邪曲媚逆璫稱頌遍于朝野祠祝滿  
于寰區

絲綸票擬動輿

至尊並稱璫心志日廣先圖封拜因肆逆謀時  
言邊事者必謂廠臣壯猷神算卽邊臣歸  
功不曰祕授方略則曰廠臣發縱真言言  
欲嘔字字遺羞乃始以奸細誣殺聶廷瑾  
陳司馬力阻之後卒殺武長春竊伯爵未

卷三十三  
三  
幾撫錦州之捷晉位上公尤古今一大怪  
事也謹敘東事確略如左

天啓六年正月奴酋大舉渡河衆至數萬其  
最勁者人被鐵鎧二重號鐵頭子驚悍尤  
可當三至寧遠四百餘里列城六七皆料  
不敵盡歛士馬入寧遠城遼兵遼將爲多恨  
如入骨以故決意死守廿三日虜列營城下  
次日疾攻東門俱推堅車薄城車用數寸厚  
板冒以生牛革斜蓋其上藏健酋于下鎚鑿

壞城十餘處矢石不能制後擁鐵騎其酋長  
督率嚴酷勢頗張寧前道袁公崇煥與諸將  
議架西洋大砲十一門從城上擊週而不停  
每砲所中糜爛可數里而諸火器無不盡發  
發亦必傷獨城下未有以施急束葛秸灌脂  
滲以銃藥燃之用鐵鈎投下車鱗疊不得開  
焚死甚衆斃其錦服者十餘人卽彼所謂孤  
山牛鹿者也虜號哭昇屍而去是日自辰至  
晡殺虜二三千人虜少却廿五日轉攻西門

其勢更悍先登者更衆城中禦之如前虜冒  
死攻益力而我兵所擊殺更倍于昨未哺虜  
却兩日來城中卒盡登陴用命士女傳餐飽  
之每中虜咸鼓掌歡呼其勇可賈虜自此竟  
退袁公卽夕募敢死士五十人縋城而下悉  
焚其遺棄車械次日拾虜矢得十餘萬枚見  
城上大小穴至七十餘而查硝黃庫亦已盡  
咸驚喜不置遼民適有虜中歸者始知彼甘  
三日督陣者李永芳廿四日修養性也先是

虜訊日急袁貽書典關陳公祖苞言關外兵  
將或畏怯改服潛逃必嚴覈勿納庶幾可守  
否則去如逝波必無幸矣陳答以晝夜殫精  
不漏一卒卽公親至關門必不容入也自是  
凡逃者悉捕正法將士聞之皆無退志說者  
咸謂關外之功得守關者而成然逆璫終以  
聶事銜陳矯

旨遂之勘功及部敘皆優處格不行璫竟冒肅  
寧伯袁公大捷功僅晉巡撫而已是秋老奴

憤鬱疽發背死蓋犯順以來所向奔潰未有  
如此大衄也後內臣劉應坤紀用陶文出而  
督師虜騎雖三窺錦州兵不滿萬所擊殺不  
過數百人飾稱一月三捷璫復進侯而公繼  
用又以偶駐錦城遇虜怖甚憾袁不早援竊  
之于璫凡私人莫不加蟒玉世爵袁獨不及  
又嗾言官擠之移病而歸非

聖明踐祚賜環重任東事安知所終耶

附示諭

督撫袁 示諭遼東官兵士民及金白東西  
各忠義等夷知悉奴酋暴虐逆天壞我遼  
土遼民戮此附近各夷天人共憤今違天  
冒暑犯我封疆西城一戰是天亡奴賊但  
中有所傷者多是我遼人我屬夷我心深  
爲憫惻主奴酋不量力遠攻寧遠又被我  
兵殺死無數如錦州城南亦被我兵殺死  
無數奴氣喪盡進退兩難連日他的動靜  
我豈不知欲加兵于巢穴慮恐玉石不分



所以稍緩以待西南之大兵到日同你們  
約定的機關裏應外合豈能逃哉你們得  
便下手不必太速東西恭順屬夷速去寧  
遠投降我遼東之衆不必赴寧遠投降可  
在此共圖滅賊不失封侯之爵當如被奴  
逼死于矢石之下乎奴如輕視錦州錦州  
官兵無不用命殺賊他若速臨城速死遲  
臨城遲死只恐他原望錦州他的巢穴到  
被我水兵陸兵剿得空了那時奴賊有家

難奔後悔何及你等有忠義者速圖之勿  
失前言特諭

五瑞

黃河清  
玉璽出

麒麟生  
甘露降

鳳凰見

黃河清

萬曆辛亥天啓辛酉間自河南至陝西界黃河  
清兩次每經三日

蘭州于庚申八月十五日巳時河流忽泛上  
白色至申時水清戶部郎中黃襄親詣河邊  
觀看果見黃河之水徹底澄清上下數十里  
一望無際至十七日復渾 華山老人歌頌  
云黃河清聖人生曷言乎黃河清聖人生

有所開真元亭毓盈而來重光辛淵獻亥月

涂十二月只萬壽節胎

龍躍五今上行五祥初孩不見正德之季河一清

世廟嘉靖當年實應真于今誰協惟

崇禎

麒麟生

鞏昌府會寧縣寡婦關氏忽于天啓元年二  
月初一夜夢一人身穿綠袍向氏借宿驚覺  
次日天起霧家有一黑牛產犢遍身鱗甲頭

蹄各異紅麻色微毛連呌數聲其音不似生  
犢至初三日沒氏又夢一大龍入庄後隨醒  
將牛所產異物隱匿鄰人李春暘報縣取獲  
看驗果係頭角俱全鱗甲磨身似鱗

青州府王九嘗家于天啓丁卯三月初八日  
辰時有耕牛產犢一隻遍身鱗甲形似麒麟  
產時燁然光焰母牛驚跳吼呌其犢不逾時  
而隱將原物呈送到州驗得本犢碧皮朱唇  
鱗甲分明宛然一麒麟也

鳳凰見

開封府禹州紫金里有大隗山一座離城四十里于天啓二年十月初九日午時有大鳥高六七尺渾身綠色頭上豎毛一撮集于山上卽有大小羣鳥不計其數俱來相隨四面旋繞東西占三里長南北一山遍集十二日申時飛去各鳥仍隨之人俱指是鳳皇

玉璽出

彰德府臨漳縣有鄉民邢一泰于天啓四年

九月初四日辰時經本縣務本庄東去磁州  
八里漳河西畔耕地忽風大起旋轉半晌隨  
見河崖灘塌聲震如雷祥光圍繞直騰而上  
一泰就而視之閃出黃白色物一塊大如斗  
視有篆文不能辨識隨報本縣儒學生員王  
思桓王燦同視料爲至寶不敢隱匿理合呈  
縣知縣何可及當堂淨拭見其晶潔異常光  
燦陸離龍紐斗形方各四寸厚三寸重一百  
一十餘兩隨審視其篆文曰受命于天既壽

永昌覽讀駭異此歷代相傳國璽數千年未  
構之奇寶何以沉沒于茲土而發現于今日  
也卽設香案叩拜兩院具疏恭進

朝廷

### 甘露降

蘇州府吳縣華山于天啓乙丑冬十月二十  
八日甘露降山巒若沐林木徧乳二旬不散  
丙寅秋九月二十八日甘露降雲端晝墜紛  
如白珠艸木均布匝月不散 丁卯秋八月



二十四日甘露降霏灑天淵膏浥其美五旬不散正應

今上卽位之日記曰王者德至天則甘露降德及艸木則甘露降抱朴子曰何知天上不凝甘露淵須太平而灑之

華山老人歌頌云符瑞并王道亨曷言乎符瑞并王道亨亨有所爲知微知彰柔剛宜燭亂剪姦玩股掌色聲不動劒已施不見甘露朝溥璽夜呈一角九苞迭獻靈于今微得顯

崇禎

五奇

艸木兵  
明月夢

風波柱  
曲突書

震澤漁

艸木兵

天啓間逆璫魏忠賢兇謀叵測密遣心腹廣  
布金錢凡輿臺隸卒皆其耳目所謂打事件  
者初繇都門漸遍海內卽重閨襲幙之內不  
敢題一魏字人心皇皇都無生趣時嘉禾一  
鉅卿素懷忠義先以直諫被黜棲遲林泉幾  
三十年折節下士能急人之難屢廢屢起號  
爲江東二民甲子復以上言觸璫落職杜門

講易而感切時事憂形于色爲姦黨所忌深  
懼不免里曲貴人之附權門者長箋索賄誑  
以保全而每受其欺也時傳縱騎迭出某某  
逮矣心怦怦若羣鹿之擊遂病忡忡卽家監  
閹人入啓事亦殷鯨錯愕疑駕帖之至是謂  
艸木皆兵也

風波柱

丙丁兩年天地翻覆忠良塗炭有一木天貴  
人學行俱優以忤璫削籍而附逆者不容時

聞惡音旦夕不保愴然長歎有出世之思緣  
親老子幼不能遠離乃攜一蒼頭夜半辭家  
道裝潛迹至京口買扁舟往來于金焦之間  
身若浮鷗與波上下日則遣奴登岸探聽北  
音夜則維舫蘆渚僵臥終宵每于清風皓月  
之下詩酒遣懷時矚兩山之爲長風巨浪撼  
擊不休而突兀孤峙居然天表不覺相對黯  
然念此孱眇之軀迄無定泊何似此山之屹  
立亾恙乎戊辰

環召復渡此江綵鷁中流簫鼓繼發冠蓋爭迎  
回視兩山如故無炎涼態雲門研史爲作風  
波柱

震澤漁

熹宗朝閣禍慘毒一罹其羅罔不薶粉亦有潛  
機倖免者時有一黃門常以侃直爲奸逆不  
容訟賊遣戍而惡黨信信必加戕害出都門  
時厚托一死友曰公如憐我乞煩密探有凶  
耗卽覓急足馳報當自裁不爲奄豎所摧殘

也乃叩首泣別攜一侍兒兩蒼頭竟赴戍所  
諸武弁知其賢紳深相禮敬迭爲飲讌必至  
丙夜酩酊而罷黃門置密室二間各設一榻  
每醉必獨寢至日下春方起盥沐一日得長  
安密信僞稱憲差他往爲諸弁後計又欲釋  
其防嫌乃陽逡巡不行會飲如常忽一日夜  
深酒散獨與一蒼頭從室後壞牆而出雞鳴  
度關侍兒守至日晡扃戶不起且不聞鼾息  
聲方怪異錯愕武弁適來訂酌乃排闥視之

但餘空牀剩簡屋壁有穴莫跡其蹤矣黃門  
間行抵家已預戒家人備漁舫數隻泊于太  
湖之濱網罟畢具遂攜眷屬居焉數日後逆  
璫矯

上旨遣緹騎拘逮至衛所諸弁謂奉差去矣復至  
本籍又云着伍矣黃門巧免慘禍乃日泛遊  
清流間天空水濶把釣自娛閒看奴子張網  
捕魚沽酒烹鮮以遣日幸逢

聖天子踐祚矜察冤臣下不罪之旨黃門乃出



具疏謝

恩尋有言路交章薦引行將復職爲

清時耳目之司于是湖天逸叟拈筆作震澤漁  
以紀之

明月夢

慨自閹禍作而能捐生徇國者固難其能謝  
榮而恬退者誠亦不易也吳門有一繡衣清  
操絕俗仁德普被璫知其名而招之繡衣每  
託疾不見目覩舉國若狂度不能獨立于是

思愛其身以有爲矣每書空浩歎念少孤子  
立烏烏之私未遂太夫人漸老以璫燄叵測  
不敢迎養清夜展側心惻惻若痛一似母之  
嚙指念子時也太夫人家居嘗于明月之下  
焚香籲天曰我止一子鯁直不阿今庵寺作  
亂豈能相容何日離廂口歸林下母子重懽  
倘素娥有靈賜我一夢以卜休咎是夕果夢  
繡衣執簡而拜于堂下也繡衣于長安旅邸  
亦常夢如之每驚覺而明月在窻餘香一篆

因思之我母寧無夢乎繡衣元配錢孺人賢  
孝有德極意承懽奉養以代子職朝夕拮据  
勞悴自諳不幸暴卒未免以尸饗煩太夫人  
繡衣力 疏歸養幾觸璫怒賴 天變震動  
迺得

俞旨星夜馳還母子噓噓相慰良久太夫人仍  
于明月之下焚香叩蒼念夢之靈因曰常聞  
日有所思夜形于夢自今以後我無夢矣第  
蘭閨無人奈何繡衣曰我婦相安于寒素而

不及同享榮祿且子女成立寧敢相負誓不  
再娶矣詰朝捧觴稱慶太夫人曰汝不附逆  
璫是不負

君忠也作令五年囊無長物廉也棄官養母孝  
也壯年不娶義也貧而好施仁也五者人之  
所難而汝秉之一身榮幸極矣今日見汝衣  
冠楚楚恍若夢中所見也我樂何如鄰右老  
農聞之爲書明月夢

曲突書

甲子歲茗溪一太學生高才洞識名振詞林  
三十年矣就試北雍鉅卿勝流莫不與之游  
秋闈登乙榜選人擬授孔目協修

國史以璫禍起而謝去先是讀楊都憲漣擊璫  
疏知其叵測因謁首輔福唐福唐攢眉稱病  
甚不能久談其孫中祕君馨密與太學言兩  
日聞內情形不善又蒲州相國從閣中見揭  
卽報福唐曰此事我輩不能言而楊大洪言  
之我輩當愧死矣福唐則拍案叫曰誤誤禍

公三月  
自此起矣而楚人有雅不善福唐者過飾其  
詞應山聞而弗懌好事者甚欲以義旗廻指  
福唐太學感福唐國士之知欲以古大臣去  
權璫如宋王沂公我

朝楊文襄盛事相感諷迨烏程相國赴內召出  
過太學邸中述其事太學心訝此璫之校包

藏禍心但驚伏耳遂扼腕發憤上福唐書

書見

大學士葉公傳後

介君馨投之大有感動俄而萬郎

中以摘廢銅事杖斃林御史以杖小璫衝節

事亾命 駕帖紛出而士大夫氣日索向之  
勢伏者咆吼奮威不可遏已福唐遂不能擔  
當決意去矣嗚呼福唐能領略太學之議而  
悉力調停 國是逆璫豈至此肆惡哉思夫  
太學之書誠然曲突之見也

頌天臚筆卷之二十三

頌天臚筆卷之二十四

吳門布衣金日升彙次


附紀

旌忠卹典

原任都察院左都御史今贈太子少保兵部  
尚書謚忠憲高攀龍忠惟報主智足辨奸  
留播遷未盡之身挫貪逆方張之焰煬竈  
熏天處辦從容于止水亭緹騎動地來祗  
憑弔于汨羅澤



原任都察院右副都御史今贈太子少保兵部尚書謚忠烈楊連冰心鐵面義膽忠肝首發大逆二十四罪日星同懸身繫檻車五千餘里道途掩泣就逮遙拜君親垂死不屈獄吏家于何有世實賴之

原任都察院左僉都御史今贈右副都御史謚  
左光斗士欽斗岳世共安危封事直陳姦狀生氣時凜桁楊竟斃忠鯁死骨必馨

原任應天巡撫都察院右僉都御史今贈兵部左侍郎周起元以庇民而忤璫遽焚詔而補牘三吳繫南畿之命灑淚千家八閩餘萬古之輝其心九死

原任工部屯田司郎中今贈光祿寺卿萬燝抗章斥逆聲振郎曹矯詔立殺鬼銷士類原任翰林院右諭德今贈詹事府正詹事繆昌期畫地對簿問罪木天人望堪憐

原任吏科都給事中今贈太常寺卿魏大中

首垣直節風生慘繫貞心日皎

原任吏部文選司員外郎今贈太常寺卿周  
順昌衾影無慙心曲桎梏亦是全歸

原任福建道御史今贈太僕寺卿周宗建坐  
前五疏足摧逆膽身後全卹已奉綸音

原任福建道御史今贈太僕寺卿李應升昌  
言可泣鬼神瀕死不忘君父

原任山東道御史今贈太僕寺卿黃尊素繫  
璫誓不俱生累忠何辭一死

原任太僕寺少卿今贈本寺卿周朝瑞獄底  
冤沉永夜殿爭氣奪層霄

原任河南道御史今贈太僕寺卿袁化中秉  
憲心如砥石捐軀節凜冰霜

原任陝西按察司副使今贈太僕寺卿顧大  
章直道橫死何辭誣服株連莫訴

原任山西道御史今贈太僕寺卿吳裕中白  
簡五夜霜飛丹闕一時雲暗

原任四川道御史今贈太僕寺卿夏之令觸

閹盡是剛腸斃獄終無繞指

原任吏部考功司郎中今贈太常寺卿蘇繼  
歐冰鑑祗懸照膽鐫籍尚逼投繯

原任揚州府知府今贈太僕寺卿劉鐸加以  
語言文字之罪何忝綱常節義之身西市  
慘聞長安心動

原任翰林院簡討今贈侍讀學士丁乾學忠  
臣因事獻規逆璫恣意脅殺旣特恩辦講  
讀之班應照例擬祭葬之典

原任後軍都督府經歷今贈刑部員外郎張  
汝旣以義憤誣戍又從例外加刑殺之非  
辜卹之宜亟

誅逆爰書

刑部等衙門

題爲遵

旨會議事河南清吏司案呈奉本部送刑科抄  
出本部等衙門題前事抄部送司該本司  
署司事主事楊鳳翥同本司主事袁文新  
王汝受會同湖廣道監察御史曹谷山東  
道監察御史吳尚默大理寺左寺左寺正  
何京右寺右寺副喻思慥貴州清吏司署

司事福建清吏司員外郎康承祖會議得  
犯人三名口魏忠賢年六十歲係直隸河  
間府肅寧縣人係淨身男子於萬曆十七  
年間選入 皇城歷轉司禮監太監總督  
東廠官旗辦事客氏年四十八歲係定興  
縣人侯二妻選乳進

內封奉聖夫人崔呈秀年五十五歲係順天  
府薊州人中萬曆癸丑進士歷陞兵部尚  
書該魏忠賢先存冒爵寧國公今問斬已



處決侄魏良卿客氏先存冒濫都督今聞  
斬已處決男侯國興崔呈秀在官男崔鐸  
各前後招稱魏忠賢平生狡險異常先年  
伏侍

先帝青宮此小慝懃巧結寵愛矚

登大寶側身禁密就不合踞掌東廠印信恣意  
作惡又不合串合阿乳客氏關通線索百  
般煽惑任憑出入

詔旨宮闈外廷事權隻手握定敢有觸忤應時

殄滅又不合嗔怒左都御史楊漣等同工部郎中萬燝露章交攻罪惡先將萬燝矯旨廷杖一百棍爪牙內監多人擁門揪髮棍毆錐刺不日身死鉗制九卿科道緘口吞聲廣布戳番四處捉打事件無端風聞小事動輒擅用數百斤大枷立枷九門等處枷死不下百十餘人復遣緹騎逮繫楊漣左光斗周朝瑞魏大中袁化中顧大章王象采周宗建繆昌期夏之令等着令錦衣衛

田爾耕鎮撫司許顯純等非刑酷拷羅織  
成招先後斃命身無完膚備極慘毒又唆  
蘇杭織造心腹內監李實捏疏叅論都御  
史高攀龍巡撫周起元周順昌黃尊素李  
應昇等飛遣驍悍緹騎激變地方高攀龍  
投水身死起元等四命刑斃詔獄又將  
無影詩句逮繫揚州知府劉鐸百計誣害  
密串腹弁張體乾谷應選飄空捏坐呪咀  
斬絞立殺五命又將番役搜拏顧同寅孫

文豸舊書詩章內有譏諷忠賢字樣硬坐  
妖書梟斬又誘吳養春義男首討黃山課  
稅坐陷養春全家斃獄又將吏部尚書等  
官張問達等捏坐贓私追比又將守法無  
罪官員耿如杞唐紹堯等無辜逮問坐贓  
懸罪又串客氏索取 皇親張國紀米石  
不遂捏占皇店將國紀家人立枷斃死數  
命多方搖動

中宮竟唆腹黨劉志選梁夢環誣劾國紀徑逐

回籍致遺

國母憂憤時忠賢兇狠熾發日峻捕并楊寰孫  
雲鶴將平民平空捉拿斬絞立枷致死于  
命惡焰熏天震動

宮闈爲因客氏悍妬與

懷寧公主母

成妃李貴人及

裕妃馮貴人不睦忠賢誠恐 二妃漏泄奸

詭事情不思主母分尊輒敢大逆不道欺

瞞

先帝即時矯傳假旨將

成妃革奪

裕妃逼令自盡冤慘彌天又不合借名內操  
身典禁兵蓄養死士千餘陰謀不軌擅將  
山海宣大等鎮設立心腹內監數十員役  
鎮守所有咽喉地方兵馬錢糧漕運處處  
布置私人李明道等使其呼應又不合同  
客氏將

內府財物

乘輿服御及

祖宗朝歷代傳國鎮庫奇珍異寶令伊侄魏良卿與客氏男侯國興搬盜一空堆積私家填屋充棟見奉

旨抄沒各城陸續進

內冊籍可據又假

旨傳客氏廕子部擬一蔭尚嫌其少再添一蔭比崔呈秀先任淮揚巡鹽御史貪污被先

任左都御史高攀龍叅論罷職勘問追賊  
見得魏忠賢專權擅政亦不合青衣小帽  
哀求庇飾忠賢即矯

旨召復原官又不合故違交結近侍律奴顏婢  
膝結拜忠賢爲義父身爲義子尊稱忠賢  
尚公祖爺等名號出入

禁闥招權納賄引用匪人把持

朝政謀洩私怨與忠賢計殺高攀龍等多命  
假借門戶名色排陷善類重罰辟遣輕賄



削奪以背後議議怒吏部郎中蘇繼歐繼  
令自縊以布政丘志充買官銀三千誣鉅  
之禮部尚書李思誠削籍追賊抱冤莫訴  
賁緣巡視工程驟躡工部尚書兼銜左都  
御史訃聞母憂不肯回籍奔喪機乘

先帝彌留兵部員缺不繇會推藉忠資矯

旨陞補又不合將今革任未到官伊弟崔凝秀  
冒陞浙江總兵又將先存今故娼賤樂戶  
蕭惟中濫推

欽點密雲車營都司呈秀兄弟奸黨中外掌握  
兵權要做忠賢外應先期安排串同別案  
問斬孫如列曹代何等稱頌忠賢功德朔  
建生祠僭與文廟並峙傾動海內人心又  
令其腹黨叅將靳廷桂爲天津守祠官遊  
擊錢體乾爲河間府守祠官都司張夢吉  
爲蔚州守祠官百戶沈尚文爲浙江守祠  
官到處獻媚勞民傷財動費百萬有忠賢  
孽侄魏良卿初授錦衣衛指揮歷陞都督

冒封肅寧侯伯尋冒太師寧國公敞建府  
第廣撥莊田頒給

誥券又將伊侄四歲乳臭魏良棟冒封太子  
太保東安侯三歲乳臭魏鵬翼冒封太子  
少師安平伯魏志德都督同知魏希舜左  
都督魏希孔世襲左都督魏撫民尚寶司  
卿魏希孟世襲指揮同知伊親楊文昌太  
子太保左都督楊胤昌都督僉事馮繼先  
都督同知傅之琮都督同知董芳名都督

僉事楊昌祚都指揮使王祿都指揮使俱  
皆冒支俸祿輒敢勒石立碑安豎司禮監  
公署心猶未厭又唆使腹黨豐城侯李承  
祚疏請比徐達例封兩公世爵崔呈秀在  
官長男崔鐸冒側生員倖中順天鄉試又  
將在官次男崔鏜濫授錦衣衛指揮使三  
男崔鎰濫廕錦衣衛指揮僉事猶復藉口  
叙功等項名色與忠賢冒濫廕襲恩賞不  
計其數種種不法惡跡貫盈隨該禮科都

給事中吳弘業雲南道監察御史楊維垣  
前後交章叅劾該兵部接出

聖諭朕御極已來深思治理乃有逆惡魏忠賢  
擅竊國柄蠹盜內帑誣諂忠直草菅多僉狼  
如虎狼本當肆市以雪衆冤姑已從輕降發  
鳳陽矧巨惡不思自愆輒敢將素蓄亡命之  
徒身帶兇刃不勝其數環擁隨護勢若叛然  
朕心甚惡着錦衣衛即差的當官旗前去扭  
解押赴彼處交割明白其經過地方着各該

撫按等官多撥官兵沿途護送所有跟從  
奸即時擒拏具奏勿得縱容遺患若有疎虞  
責有所歸爾兵部馬上差官星速傳示各該  
衙門遵行特諭欽此欽遵又該司禮監傳出  
聖諭朕聞去惡務盡御世之大權人臣無將有  
位之炯戒我國家明懸三尺嚴繩大憝典至  
重也朕覽諸臣屢䟽陳列逆惡魏忠賢滔天  
罪狀具已洞悉竊思

先帝以左右微勞稍假恩寵忠賢不思盡忠報

國以酬隆遇專一逞私植黨怙惡作奸盜弄  
國柄擅作威福難以收舉畧數其槩將

皇兄懷寧公主生母成妃李氏假旨章奪至今  
含冤未雪威逼已封裕妃張氏立致捐生雖  
死九泉其目未瞑借旨擅將敢諫忠直之臣  
羅織削奪慘毒備至又復串同心腹酷刑嚴  
拷誣捏贓私立斃多命他若謾謬痛於杖下  
柔良枯於立枷臣民重足道路以目而奸惡  
乃身受三爵並崇五等極人臣未有之榮通

同客氏表裏爲奸當

先帝彌留之時猶復叨恩晉秩無有紀極今賴  
祖宗在天之靈海內蒼天有幸天厭巨惡神奪  
其鬼二犯罪狀次第畢露朕又思忠賢等不  
止窺攘名器紊亂刑章將我

祖宗蓄積庫貯傳國奇珍異寶金銀等物朋比  
盜竊幾至一空何物神奸大膽乃爾本當寸  
磔念梓宮在殯姑置鳳陽即將二犯家產  
着錦衣衛會同五城及緝事衙門親詣住所



將一應家貲莊田及違禁等物盡數籍沒入  
官逐件從實開列來看其原籍違式服舍等  
項着落有司清查的確具奏如有隱匿蒙蔽  
等情許據實糾叅一併連坐亦有不得株累  
無辜其冒濫弟侄親屬俱發煙瘴地面永遠  
充軍嗚呼大奸脫距國典用章事麗于辟情  
罪允孚特諭欽此欽遵又該吏部等衙門太  
子太師尚書等官房壯麗等題爲遵

會議事奉

聖旨逆黨崔呈秀負國忘親通內擅權雖死尚  
有餘辜着法司按律確擬暴著其罪以垂永  
戒該衙門知道欽此欽遵又該刑部等衙門  
太子太傅尚書等官蘇茂相等題爲遵

旨會議事奉

聖旨奸惡魏忠賢串通逆婦客氏恣威擅權逼  
死裕妃馮貴人矯旨革奪成妃名號慘毒異  
常神人共憤朕與昭雪復號以慰

先帝在天之靈其戕害縉紳盜匿珍寶未易救

舉皆繇崔呈秀表裏爲奸包藏禍心謀爲不軌仰賴宗社有福陰謀隨破二兇天殛人心差快乃五虎李夔龍等附權驟擢機鋒勢焰赫奕逼人五彪田爾耕等受指怙威殺人草菅幽圉纍囚沉寃莫白其元兇客氏魏忠賢崔呈秀早定爰書虎彪俱照各官前後叅疏着法司再行依律擬罪以伸國法該部知道欽此欽遵通抄到部送河南司又該保定撫按拏解逃犯魏志德魏良棟等到部批

送貴州司收問聞、該順天撫按奏稱蕭  
惟中病故緣繇在系隨該本司牌行薊州  
提解崔呈秀冒濫錦衣衛指揮僉事世襲  
次子崔鏜到司該本司呈堂移咨都察院  
照會大理寺請官會審間蒙批河南司會  
同貴州司行奉此案呈本部咨行都察院  
照會大理寺委官去後隨准都察院劄委  
湖廣道監察御史曹谷山東道監察御史  
吳尚默大理寺劄委左寺左寺正何京右

寺右寺副喻思慥各職名前來該本司署  
司事主事楊鳳翥同本司主事袁文新王  
汝受會同湖廣道監察御史曹谷山東道  
監察御史吳尚默大理寺左寺正何京右  
寺副喻思慥貴州司署司事福建司員外  
郎康承祖行提魏良棟等并崔鏗一千人  
犯於

都城隍廟逐一研審各犯招與魏良卿等初  
招無異會議得魏良卿掃除官奴客氏與

臺猥婢也一微扈蹕之寵親臣自命一時  
青宮之愛祿姆爲功忠賢藉客氏以窺伺  
禁闥客氏藉忠賢以立威外庭於是謀合  
連環奸同狼狽怙勢弄權無所不至口傳  
詔旨手握斜封逢之則富貴立得犯之則玉石  
俱焚塞諫諍之路仗馬不留杜指摘之門  
戚畹頓剪緹騎四出海宇驛騷幾成反汗  
之勢鉗網橫加忠良駢首頓結飛霜之慘  
寶王大弓盜歸私室銅符鐵券盡付傭奴

甚且矯革貴嬪甚且逼死賢妃甚且搖動中宮罪狀如斯已不勝誅矣乃名位適於尚父祠宇逼於素王忠賢之無將也

冊號雖曰奉聖擅寵幾於耦尊客氏之無等也借操練之名乘釁瑕於肘腋假整飭之說擁重鎮於要津陰養死士陳兵自衛如聖諭所云素蓄亡命之徒身帶兇刃不勝其數環擁隨護勢若叛然此其包藏禍心尤爲叵測豈臣子所忍言耶昔趙高煽虐不聞

倚長舌之奸王聖恃恩未有腊刑餘之毒  
此二兇者陰謀相濟幾令

廟社危疑逆惡並逞已見神天震怒千紀犯順  
罪莫大焉信稱千古之窮竒允當一朝而  
並磔者也合引謀大逆律二犯同謀凌遲  
處死崔呈秀梟獍其心大豕其行士類比  
爲跼蹐班行稱爲獐狝始以呈身入幕暫  
寬饕餮之誅旣而蒙面還臺益肆魚休之  
氣借門戶之混名剪除異已仰逆璫之鼻



息引用壬人奔競自是而成風譙亮因之  
而避色苞苴充斥肺腑昏迷請托公行紀  
綱掃地踞栢臺之長箝制言官擅樞密之  
尊把持軍府金穴擬郭況之藏豪奢丐鄧  
通之寵呼嗷潛通於禁地頻笑必窺線索  
暗度于掖庭戾福立見斯爲乞靈播惡之  
尤矣夫非稱功頌德之首歟母死不聞濁  
亂數年之

朝政乾兒作孽驚惶一世之人心人知呈秀

之穢跡醜形見忠賢而畢露而不知忠賢  
之兇鋒毒焰因呈秀而益張也虎噬實云  
盈貫雉經猶未蔽辜相應比照交結近侍  
官員律斬至如魏良棟魏鵬翼魏志德魏  
希舜魏希孔楊文昌魏撫民楊胤昌馮繼  
先傳之琮董芳名楊祚昌王祿魏希孟一  
十四名身同廝養纖毫無効于公家冠類  
沐猴恩廕濫膺於下賤碑名臚列逆惡疆  
彰又如崔鐸身爲敗種名玷賢書席構禁

而幾諫不聞受豢養而改圖安在崔鏜崔  
鑰黃口孺子冒濫錦衣逆孽之禍未央羣  
毒之報甚速以上各犯夤緣有禁投畀何  
疑俱應仰遵

聖諭癸烱瘴地面永遠充軍第其中魏良棟年  
僅四歲魏鵬翼年僅三歲崔鏜年僅七歲  
崔鑰年僅三歲蒙蒙未視貿貿無知加之  
世襲忽若富貴之逼人惟彼元兇實害無  
辜之赤子倘於此四犯者憫彼無知寬其

一面是尤

聖朝浩蕩之仁施於法外非臣等所敢輕議也

將魏志德等取問罪犯十七名魏志德年

六十五歲魏良棟年四歲魏鵬翼年三歲

魏希舜年二十一歲魏希孔年三十一歲

魏撫民年十一歲魏希孟年十二歲楊文

昌年十六歲楊胤昌年十二歲楊祚昌年

九歲馮繼先年十九歲傅之琮年十二歲

董芳名年九歲王祿年三十歲俱河間府

肅寧縣人崔鐸年二十五歲崔鏗年七歲  
崔鏞年三歲俱順天府薊州人各招同讖  
得魏忠賢等所犯魏忠賢客氏俱依謀大  
逆者律皆凌遲處死决不待時崔呈秀依  
諸衙門官與各官交結夤緣作弊扶同奏  
啓者律斬魏志德魏良棟魏鵬翼魏希舜  
魏希孔魏撫民魏希孟楊文昌楊胤昌楊  
祚昌馮繼先傅之琮董芳名王祿崔鐸崔  
鏗崔鏞俱係冒濫弟侄親族各遵

明旨俱發烟瘴地面永遠充軍招送兵部定衛  
拘僉妻解發遣照出魏忠賢崔呈秀俱應  
自縊魏忠賢仍應戮屍凌遲崔呈秀仍應  
斬首合行原籍各撫按于河間府及薊州  
各行刑客氏身屍無憑查戮聽候

明旨發落未到崔凝秀候

旨另結魏志德等通取批迴附卷餘無照該本  
司會同道寺等官將逆犯魏忠賢等各擬  
罪議擬明白并將魏志德崔鐸等行提前

來問擬各前罪案呈到部該臣等會同太  
子太保都察院左都御史臣曹思誠大理  
寺署寺事左少卿臣姚士慎等魏忠賢等  
議擬前招并審魏志德崔鐸等各招前情  
明白會看得人臣無將將則必誅况刀鋸  
之餘役乎魏忠賢挾

先帝寵靈箝制中外交結客氏睥睨

宮闈其大者如真怒張國紀則立枷而殺數  
命且連縱屬犬必搖動乎

中宮私憾

成妃

裕妃則矯詔而革封御至摧勦難堪竟甘心  
于非命夫且不知上有

君父矣其于臣僚何有于是言官死杖大臣死  
獄守臣死于市曹緹騎四出道路驚鬼告  
密一開都民重足生祠遍海內半割素王  
之宮諛頌滿公車如同新莽之世

至尊在上而自命尚公開國何勲而數分茅土



尚嗾無恥之穢侯欲駢九命疊出心腹之  
內黨遍踞雄邊至于出入禁門陳兵自衛  
戰馬死士克滿私家此則路人知司馬之  
心蓄謀非指鹿之下者也天討首加寸磔  
爲快客氏妖墓食月翼虎生風  
輦上聲息必聞禁中搖手相戒使

國母常懷乎憂憤致

二妃久抱乎沉寃且

先帝彌留之且詐傳蔭子尚以除一爲嫌私藏

見籍之賍絕代珍奇皆出

尚方之積通天是罪盜

國難容若崔呈秀則天類鴟鴞衣冠狗彘誰  
無母子而金緋蟒玉忍不奔喪自有親父  
而婢膝奴顏作闔乾子握中樞而推弟總  
鎮兵柄盡出其家司位司馬而仍總蘭臺  
立威欲箝乎言路睚眦之仇必執威福之  
焰日薰總憲夙仇迫爲池中之鬼銓郎鉅  
嚇驚懸梁上之鰥兒逆豎之屠戮士紳皆

本犯之預謀帷幄選娼挾妓歌舞達於朝  
昏鬻爵賣官黃金高於北斗假山水泮遊  
釜鬼消雖已幽快於鬼誅仍當明章於

國法其餘魏良棟魏鵬翼魏志德等十四名  
及崔鐸崔鎡等或赤身袒僧或黃口嬰兒  
濟惡而玷賢書無功而嬰世爵均應投於  
荒裔以大快夫羣情旣經該司會同道寺  
等官議擬前來相應題

請合候

命下本部將逆犯魏忠賢崔呈秀行原籍撫按  
魏忠賢於河間府戮尸凌遲崔呈秀於薊  
州斬首各行刑訖撫按具本奏

聞客氏身屍併請

勅示發落仍將問過罪案川定爰書頒布中外  
曉諭其魏志德等俱遵照前旨發煙瘴地  
面永遠充軍各犯

誥命通行追奪奏繳內魏良棟魏鵬翼崔鏗崔  
鑰四名統候

聖明裁奪施行緣係逆犯蚤定爰書事理臣等  
未敢擅便謹題請

旨

崇禎元年正月二十六日具題二十七日  
奉

聖旨覽奏逆惡魏忠賢掃除廝役憑籍寵靈睥  
睨宮闈荼毒良善非開國而妄分茅土逼至  
尊而自命尚公盜帑弄兵陰謀不軌串同逆  
婦客氏傳遞聲思把持內外崔呈秀委身奸

閹無君無親明攘威福之權大開縉紳之視  
無將之誅國有常刑旣會議明確着行原籍  
撫按魏忠賢于河間府戮屍凌遲崔呈秀于  
薊州斬首其客氏身屍亦着查出斬首示衆  
仍將爰書刊布中外曉諭以爲奸惡亂政之  
戒魏志德等俱依前旨發煙瘴地面永遠充  
軍誥命槩行追奪其魏良棟魏鵬翼崔鏗崔  
鑰旣係孩稚無知准釋放以彰朝廷法外之  
仁